

天津政俗沿革記卷七

貨殖

百貨

商棧

權稅

商會

錢幣

製造廠附

天津居南北水陸之會爲銀布杉楠果實所湊又鉅海環其東有魚鹽蜃蛤之饒當金元間人迹罕至自明永樂初民始闢而居之五方羸處於是競自營業始廓然成一大聚焉顧田多斥鹵不宜五穀於地爲瘠咸苦窳寡藏民憊爲商賈固其分也逮清咸豐之世與泰西諸國通互市結盟約海舶乃稍稍岔集於是瓌貨日至闐城溢郭旁輪百塵諸賈人往往僦屋居積貨別肆分以待其直商棧之設乃自此夥矣迄同光時中外之人益

卷七

一

錯居其間羣萃而託處旣庶且富戶口動踰百萬國家攬河海握樞要許海外通商權其百貨招徠遠人允其別立稅則故海關稅率與鈔關多寡不同議者謂須待改定也及庚子之亂常關之職亦外其柄以授人俾掌其稽禁焉閭閻之間中外交際輻葛萬端迨光緒季年乃立商會於天津商業創革利病糾紛下逮闐闐銖兩毛髮之事一倚之以辦此蓋曩世所未有也至泉幣之制吾國金銀銅三品惟銅爲本幣餘則隨時隨地而異輕重不常動輒差殊輾轉遷變遂盡迻其故此亦時勢相嬗使然又曷足怪乎惟互市久金錢之外溢者無算

海內益靡敝近則於番舶之品亦頗相師倣設廠製造
植基廣而取數多斯蓋阜豐之漸也昔禹貢周職方二
書皆備紀天下物產及史遷爲貨殖傳雖卮茜荻漆之
細亦莫不具書物力之盈虧一國之興衰繫焉固不僅
以爲生民衣食之源遂不憚言之纖且悉也然古者多
以舍本遂末爲民病及近世海外諸國乃視此爲獨重
瞻觀當世承弊易變通輕重之權徼山海之業今之勢
固有與古異者顧可以晏安已乎因綜其終始爲貨殖
志俾當世君子覽觀焉首志百貨至商棧榷稅商會錢
幣製造廠其詳可得而見者亦咸具之

卷七

二

百貨

天津闐闐繁盛百貨亦日新月異其肆貨最著者如絲
之品則有綢緞莊棉之品則有洋布莊皮革之品則有
皮貨店皮貨者衣裘之謂也自光緒宣統以來則有硝
皮店硝皮者以革製物品也衣服則有估衣莊近代又
有製造軍服則曰軍衣莊若書坊若紙局若筆墨店則
文人所取求也若古玩鋪若洋廣貨店若磁器店若銀
樓若金珠店則備修飾美觀之品也其爲人日用所需
取運最廣者則曰雜貨行米糧行所謂雜貨者薑棗糖
城之類是也米糧則五穀皆是也食品則有海味店果

品店酒店酒店之大者則曰燒鍋佐食之品則有茶葉店化食及取煖之品則有煤炭店近代則有石炭分銷處醫藥品則有藥材店近代競尙西藥則有大藥房近代銷耗品則有煙捲公司以上所述未能具備然大畧可知也天津當水陸之衝如綢緞洋布雜貨採取貨物屯聚興販所以備直隸一省之需求非僅爲一縣計也中外通商北方出口貨以毛貨爲大宗毛貨卽皮張也由西北運來薈集天津裝船出洋亦貿易運輸一大事業也均爲外商居奇津人有出資本爲此業者亦皆附於洋商仰人氣息此大不可解也從前阿片爲人鉅蠹

卷七

三

近則紙煙遍市富至巨商貧至乞匄皆吸之其銷耗視阿片有過之者天津曾創煙捲公司旋卽折本此亦商業家之憾也近時織布廠大興棉紗事業人皆知其利挽利權指顧間耳提倡種綿其根本也今之談商業者多以稅則爲言近則創造新貨可減稅釐水陸交通近亦便利總思土貨可以行銷省外由省外推至國外交易通換是商業之興可計日待也嘉道以前城北之西沽村多業木廠以船料爲最屋材次之至光緒中猶有一二存者亦一大商業也近則外洋輸入木植建造房屋多用美國松亦沿革之關鍵也發展事業豈徒握籌

算權子母而已哉酌乎盈虛消長以學識技藝居其間庶幾近之

商棧

天津爲百貨麇聚之所雜貨行棧房多設於北門迤西之針市街糧米行棧房多設於海河南運河之側大都內河行船裝運貨物卸載屯集必於近河之處取便利也自海道通行輪船往來起運貨物則又屯聚於海河附近其卸載之處以本國招商局英商太古洋行怡和洋行爲最要之地其他中外貨棧往往有之海關權稅亦設於紫竹林嗣後鐵路告成京奉總棧設於租界之

卷七

四

老龍頭京浦與京奉接軌京浦運貨幾乎以老龍頭爲尾閭此天津貨棧之大畧也近時歸化綏遠之大宗出口貨由張家口運往天津有所謂起卸行者設總行於天津設分行於北京之豐台及察哈爾之張家口一氣衝接趁車運貨抵天津後再行出洋此種運輸事業皆外商爲之本國資本家承辦分行胥作外商附屬鮮有自樹一幟者作是項營業者謂不借資外人則關津之留難路局之欺壓隨在而有人言如是其然與否與總之航業路政商情必互相聯絡均有利益可得吾國航業僅招商局不絕如縷路政名爲劃一其中分門別戶

無可諱言天津商人資本原不雄厚而勢若散沙爭目前之利無遠大之圖近人有設倉庫公司者倉庫公司卽屯積百貨之大棧房也願吾津人直起而追之至於一鋪一店屯貨之所亦謂之棧房不足論也如轉運公司有源記公司等家報關行有元豐裕等號報關行者存卸商貨代商納關稅也他如盛興棧慶記轉運新疆貨物是皆有可記者作新疆營業皆楊柳青人俗謂之跑西大營是則善於開創商業家所宜效法也

權稅

天津征權處所一曰鈔關近名曰常關一曰工關木稅

卷七

五

一曰天津道海稅一曰釐金此外則曰海關掌自稅務司者其初名曰新關也鈔關原設河西務康熙元年移駐天津道光二十三年奏準天津鈔關在海河口岸查驗閩廣商船驗貨收稅自庚子後稅關爲外人所據代徵稅課光緒二十八年收回鈔關並與各國議定凡通商口岸五十里內之關由新關稅司兼管此天津鈔關之概畧至稱名常關則始自近日也常關所徵正稅分四項曰出境稅曰入境稅曰出口稅曰入口稅工關木稅者自前明隆慶五年設丈抽之法按船之大小以徵稅課是爲船料之濫觴清代因之設置工關專收木稅

船料工關分口其設在天津者有三岔河趙家場大沽海口陳家溝紅橋五處宣統二年給事中張世培奏請將工關木稅歸併天津鈔關稽征經度支部議覆奉旨準如所請此工關設置歸併之大概也天津道海稅者係天津土稅原設海關二處一在天津開口名爲上關一在大沽名爲下關專收海船所載進口雜糧雜貨稅銀道光以前輪船向未通行所收稅銀具有成數迨輪船暢行以後收數日見短少庚子之變海船毀失過半其未毀者亦多歇業而輪船較前益多奉省又開鐵路水陸暢行運貨尤便以致海船無可攬載所收稅銀甚

卷七

六

屬寥寥至宣統年間天津道員缺未裁時海稅一項仍由天津道征收也釐金者咸豐八年英法俄美和議定後軍機大臣瑞麟奏請增設水師其酌籌餉項請勸辦抽釐奉旨交議九月僧格林沁慶祺奏準在天津設局抽捐此天津釐金開辦原始也自光緒三十三年定爲天津大名兩處得設分局抽釐其所收釐金由天津總局及老車站新車站大沽北門東芥園等處由民船所運雜貨內抽收之夫所謂新關稅者洋貨進口稅依南京條約定爲值百抽五其後締結天津條約因仍未改迨庚子之後締結新約改爲實足之值百抽五其稅目

曰洋貨進口正稅曰土貨出口正稅此卽所謂值百抽五也曰土貨復進口半稅半稅者所謂子口稅之二五也曰洋藥進口正稅其徵稅定率每箱抽正稅三十兩每箱計一百斤曰洋藥釐金光緒十年經出英俄大臣曾紀澤與英國外部議定每百斤於正稅三十兩之外加徵八十兩併在進口時輸納曰洋貨子口稅曰土貨出內地子口稅此咸豐八年約定免內地各項稅釐於正稅外徵值百之二五也曰船鈔其稅則一百五十噸以上者每噸納鈔銀四錢一百五十噸以下每噸納鈔銀一錢每四月納鈔一次各國均以英噸爲準此新關權稅之大略也將來經理財政中外商人稅率統一新關稽核取諸國人不復假借則吾國人財政學進矣萬國協和當亦樂與觀成也

商會

天津光緒庚子後十室九空市面震動商務之壞於斯爲極至二十九年眾商議救急之策稟請直隸總督袁世凱假北馬路當行公所遺址奏設商務公所聯絡商情直督札委卞煜光王賢賓甯世福公聯元爲總董是年冬農工商部奏準商會章程商務公所改爲天津商務總會遵章公舉王賢賓爲總理甯世福爲協理三十

年王賢賓等請頒給關防由直督咨部經部奏請發給天津商會關防奉旨允行王賢賓等赴部領到木質關防一顆文曰天津商務總會關防至是商會成立即公所舊地葺而新之於本會內附設天津商報復設商業中學校於東馬路募商家子弟分完全速成兩班會中舉行事宜解紛蘇困救急卹艱遇重事則集議閒有事涉爭執設評議員以理之評議員與理事人環坐一室期無不盡之辭不達之隱初商會成立遵照部章有總理協理因事屬創始權設坐辦旋經各行商公舉會董十二人各行董事十七人時入會者凡三十二行擬試

卷七

八

辦便宜章程三十條自始辦迄今日尙無所損益也若夫因仍前績而整齊之揣量時勢而擴充之固結集合衡量敷布又不第形勢之閒耳目之近也是在繼而起之者

錢幣上

清初錢制沿明以來無大異也咸豐四年內閣奏準在天津設立官鈔分局令商民等於一切官款搭交五成七年流通當五當十當五十當一百等大錢給事中吳惠元奏請長蘆搭收三成九年閩省局存鐵錢運往天津奉旨飭地方官鐵錢到津時察看情形如壅滯難行

存儲作廢此咸豐間官鈔大錢鐵錢或行之未久或未
經行使均已廢閣不用市面通行金銀之外則仍用銅
制錢惟外國銀幣頗有輸入者光緒間北洋機器局內
始行附鑄銀圓光緒二十八年直隸總督袁世凱議建
立專局其年六月以周學熙董其事是爲北洋銀圓局
二十九年三月朝廷整理財政因於天津設立鑄造銀
錢總局以軍機大臣徐世昌及陳璧張允言瑞豐掌其
事九月置大經路民地興建三十年先行試籌銅幣是
爲戶部造幣總廠造三種之幣曰大清金幣大清銀幣
大清銅幣通行天下以歸一律其銅幣肆分四種大者
重四錢直制錢二十次重二錢直十次重一錢直五又
次重四分直二鑄出銅幣不僅通行天津並可運往各
地方與制錢一律使用三十三年大清銀行發行紙幣
請由總廠鑄造銀圓爲兌換基金三十四年益復多鑄
一圓二角一角三種銀圓時制錢缺乏乃鑄一文新錢
其形式則小銅幣也自是而後朝廷每議幣制迄未見
施行其事與天津沿革無關故概從缺焉

錢幣下

國家制度前具言之矣市面則有相沿之習者市中作
錢業者俗稱曰內行凡百行業概稱之曰外行外行家

營業或以銀易錢或以錢易銀均須從內行家交易宮北設有銀市每日銀錢行市由銀市定之視需求之多寡定市價之高下如需銀者多則錢價低如需錢者多則銀價落侵晨集市日中散之然到市者僅限錢業一行也作錢業者可以發行銀票錢票其時商律未定又無登記之法銀錢票任意發行一經恐慌時有倒閉此從前錢業之流弊也近日銀行之制通行發行紙幣復有限制作錢業者資本富饒仍自發展然架空飾騙者淘汰無存銀市之習慣已不復存在矣至於匯兌多由於票莊開設票莊以山西人爲多與近日銀行大略相似惟規制不若銀行之備也光緒庚子以前票莊握商肆之鉅權庚子以後乃漸衰落矣光緒季年銀行坵設儲蓄寒儉之家養生送死子女婚嫁節日用之需爲後來之備法最善也富厚者存儲滋息亦以銀行爲歸宿也互市通商外人在天津設立銀行亦或有中外合資者民間通用固事之常國家亦有時賴之誠使國內銀行信用昭著募債儲款取資利便公私交易總以國內銀行爲宜也近日津人亦有集資爲銀行者課息寬不在苛細取途遠不規目前安見商業之興不以錢業家爲大轉移也從前使用銀塊論平論色較及錙銖卽天

津一區有所謂錢平行平議砒平其甚者運庫藩庫關道庫糧餉局支應局統捐局各有庫平局平紛紛藉藉不過上下其手易於欺飾近日使用銀圓積弊清矣惟幣制本位用金用銀迄未議定對於國內國外斟酌劃一仍須俟諸異日也

製造廠附

天津工廠之大者則爲火柴公司一設於西沽一設於芥園其餘磚窰洋灰銅鐵織染燭皂各有公司事見工藝者多志貨殖以製造廠殿之俾知貿遷有無首在自置土貨自置自運能以一縣行至省外國外斯爲造其

卷七

十一

極而握其要也此持本之論也若夫貧苦居民與工廠近者更以餘潤資生不爲行乞竊盜從來電車之設多半利在工人天津生計艱難富厚者能多立工廠附城又開駛電車資本家工力家兩相益也天津製造廠迄宣統間尙無偉大可紀者姑啟其端以俟來者